

四庫全書

集部

欽定四庫全書

劔南詩藁卷六十三

宋 陸游 撰

秋雨

老火阻餘威，賴此一雨洗。一雨豈遽涼，涼亦自此始。陂湖菱芡熟，小市新酒美。行歌多醉人，騷意溢閭里。懸知屢豐年，絲穀賤如水。呼兒具筆牘，作詩識吾喜。

江村

江村一雨喜塵清
隱隱雷車意未平
莽蒼郊原來暮色
颼颼林壑起秋聲
書希簡古終難近
詩慕雄渾苦未成
白首愈悲知我少
從今一技不須名

又

誤著儒冠不更論
白頭且喜卧江村
林深棲鳥逐更噪
埭近過舟終夜喧
病起日惟翻斷簡
愁來時亦倒清尊
自嫌未絕知聞處
尚有僧敲月下門

山行

南出柴門即是山青巖踏破白雲間旋償酒券何時足
罷諾僧碑盡日間三尺古琴餘爨迹一枝禪杖帶湘斑
吾廬北望雲煙裏又伴紛紛宿鳥還

天王寺迪上人房五十年前友人王仲信同題名
尚在

綠遶青圍古會稽城東河上古招提已公茅屋曾遊處
渭北山人半醉題暫憩不妨停画楫幽尋還得杖青藜
舊人死畫惟殘屋竹密雲深步步迷

東窓偶書

東窓終日靜悄悄消盡平生幻妄心
秋氣未催羣木脫老懷先感百蟲吟
屏風疊邃思廬阜冠子峯高憶少林
安得吾身且强健一藤隨處更幽尋

又

萬事何曾有速淹熊蹯魚腹自難兼
山川置掌猶能取日月無膠可得黏
稚子幸堪持几杖老生元自慣齏鹽
清晨臨鏡還三歎雪領今年無處添

乙丑七月二十九日夜分夢一士友風度甚高一
見如宿昔出詩文數紙語皆簡淡可愛讀未終
而覺作長句記之

客中得友絕清真蓋未傾時意已親枕冷不知清夜夢
眼明喜見老成人河傾斗落三傳漏霧散雲歸兩幻身
心亦了然知是妄覺來未免一酸辛

示子適

翁老兒窮不自支此心幸與古人期勞兼薪水奴初去

曲到琴書事可知藥杵無聲工忍病米困可埽耻言飢
餘年有幾須相守萬里煙霄付異時

小雨

赤日炎熇勢未回川雲忽起亦佳哉鴨衝細雨橋陰出
蝶弄微風草際來櫟柳不禁朝暮久芙蓉猶有二三開
一年光景煩君看何怪昆池有劫灰

舟中作

蘼蔭作帆三版舩漁燈夜泊閭門邊煙波四萬八千頃

造物推排作水仙

又

山蔬藥苗滿箸香
超然下視大官羊
更憑語與劉文叔
豆鬻從來味最長

漁父

食簞雖薄尚羹藜
且喜今朝酒價低
一櫂每隨潮上下
數家相望埭東西
團團箬笠偏宜雨
策策芒鞋不怕泥
應笑漆園多事在
本來無物更誰齊

又

數十年來一短蓑死期未到且婆婆敲門賒酒常酣醉
舉網無魚亦浩歌片月又生紅蓼岸孤舟常占白鷗波
人間各自生涯別文叔君房媿汝多

讀書示子通

時子通
方敗舉

我生無他營半世隨宦牒讒波方稽天憂與愁相接中
間稍自寬萬事付馬曹告歸幸見聽泊與淡相遭日晏
突無煙垢面有爪痕讀書則未置可笑習氣存造物哀

其窮畀之大耳兒兒亦好古學乃不售有司謂當爲瑟
縮乃如鶴昂藏父子共薄飯忍饑講虞唐豐凶有常數
蘼藜當自力古言不吾欺歲晚於汝食

秋夕

西山樵路隔重雲溪水微風起穀紋暑退忽驚秋漸晚
夜長已與畫中分菰蔣入饌渾家喜碁碁催寒並舍聞
新作篝燈學僧樣與兒同策讀書爇

醉中錄近詩因題卷後

鷺兒色淺酒醺人雞距鋒園筆絕倫滿引一盃書數紙
要知林下有閒身

貧甚戲作絕句

俸祿無餘退即耕市人指笑太清生從今惜取青鞵底
祇向雲邊水際行

又

處窮上策更誰如日晏猶眠為腹虛

飢則卧不起
貧者之常也

尚闕

鄰僧分供米敢煩地主送園蔬

又

貸米東村待不回
鉢盂過午未曾開
飢腸雷動尋常事
但誤生臺兩鵲來

又

北窗孤坐破三更
庭戶無人有月明
數種袴襦秋未贖
羨他鄰巷搗衣聲

又

竈突無煙甑有塵
頽垣破屋越溪濱
老鰥狂怪誰嗔責

日日行歌獨賣薪

又

行徧天涯等斷蓬作詩博得一生窮
可憐老境蕭蕭夢常在荒山破驛中

又

讀書但覺慙輪扁補吏非能去箭張
白髮歸為林下叟固應飢不饜糟糠

又

糴米歸遲午未炊家人竊閑乃翁飢不知弄筆東窓下
正和淵明乞食詩

自做

出仕每辭榮歸休但力耕儉勤貧亦足戒懼禍終輕學
自不欺始智由無事行書紳及銘座勉盡吾生

又

經術吾家事躬行更不疑仁常為己任清每畏人知古
訓必三復危途仍十思兢兢死方已寧論迫期頤

雨後極涼

金微未壯長火老尚餘燼可憐茅舍翁瞋目困藉躡蕭
蕭得一雨天氣頗清潤宣惟爽襟靈亦足祛疾疫浮生
日月駛老死纔一瞬聖賢邈不嗣利欲以身徇孰能痛
澡雪此道庶少進閉門君但學妙理天豈吝

醉題

來往人間今幾時悠悠日月獨心知尋僧共理清宵話
掃壁閒尋往歲詩足馬秋風入條華孤舟暮雪釣湘漓

只愁又踏關河路荆棘銅駝使我悲

秋感

畏途歷盡百年中老卧窮閭一秃翁
衣杵淒涼常帶月井桐零落不禁風
空文久悔雕蟲技大學方施習射功

佛書云如人習射久方中

萬一死前能少進九原猶可見先公

鼠敗書

雲歸雨亦止鷗起窓既白秋宵未為永
不寐如歲隔平明亟下榻亦未暇冠幘
檢校案上書狼籍鼠齧迹食簞

與果籩攘取初不責侈然敢四出乃至暴方冊坐令漢
篋亡不減秦火厄向能畜一猫狡穴詎弗獲絨藤又蕩
然追咎亦何益情偷當自戒鼠輩安足磔

秋望

千里郊原俯莽蒼三江煙水接微茫
橫林蟲鏤無全葉新雁風驚有斷行
神禹祠庭遺劒珮先秦金石古文章
一尊莫恨盤餐薄終勝登樓憶故鄉

秋夕

浴罷紗巾出草堂一枝瘦杖倚枕柳蟬吟古柳聲相續
月入幽扉影正方頻約僧棊秋漸健稍增書課夜初長
亦知桑落宜篘酒太息何時辦一觴

出遊

八月石帆秋聊為汗漫遊本因尋友去却為看山留小
草題僧壁長吟上驛樓月能從劇飲天可寄閒愁高下
評泉品縱橫記酒籌花開遇門入水長信舩流骭髀人
雖棄脂韋我自羞此心君不信試往問沙鷗

病中戲詠

八十行加二清秋住故山新涼足眠睡舊疾害躋攀雪
白紛殘鬢梳黃染病顏疲牛卧斜日羸馬噉枯菅貧廢
兒孫學慈生僕妾頑贖衣時已迫貸米歲方艱坐鉢僧
嘲薄盤餐客笑慳從今謝還往惟有掩柴關

書喜

歌斜古屋枕江干恩賜殘骸許挂冠杲臼有聲聊足食
羊牛識路自歸闌不求客恕陶潛醉肯受人憐范叔寒

兒輩漸還家
暝熟預知燈火話團樂

子龍初自江西歸
子虞亦今冬當罷

矣官

春耕

去蜀歸吳會
真成萬里行
窮通竟安在
恩怨兩皆平
文字妨求道
盃觴害養生
餘年猶有幾
買犢事春耕

秋思絕句

煙草茫茫楚澤秋
牧童吹笛喚歸牛
九衢不是風塵少
一點能來此地不

又

榮悴元知豈有常
紛紛草木占年光
霜風一掃知何在
楚客從來枉斷腸

又

一片雲生便作陰
東軒草樹共蕭森
秋風豈必關人事
自是衰翁感慨深

又

枳棘編籬畫掩門
桑麻遮路不知村
平生詩句傳天下

白首還家自灌園

又

胸次本來容具區
自私盆盎一何愚
片帆忽逐秋風起
聊試人間萬里途

又

黃蛺蝶輕停曲檻紅
蜻蜓小過橫塘老人未肯殺風景
睡起熏籠重炷香

秋興

節物喜更新清秋最可人徐行曳藤杖小立岸紗巾煙
雨迷衰草汀洲老白蘋鶴巢時託宿猿果每分珍羽客
期燒藥老人約卜鄰蘭亭故不遠千載見清真

寓歎

五畝煙蕪過半生還山自笑又躬耕春炊不繼兒啼飯
烹飪無妨客絮羹遊宦人間身愈困讀書燈下目幾盲
退之已老當更事猶向時人說善鳴

北窓

垂老乞骸骨飄然辭聖朝竹頭那足用桐尾不禁焦短
褐縫練布晨餐采藥苗風霜征雁路燈火衲僧寮隴客
詢安否貍奴伴寂寥北窓鳴落葉愁絕夜迢迢

間思

睡美精神足心空忽欲輕讀書無定課飲酒不成醒日
日東軒坐時時北渚行最奇烏柏下側帽聽秋鶯

秋光

小圃秋光潑眼來老人隱几興悠哉翩翩蝴蝶成雙過

兩兩蜀葵相背開
雨足疎籬引荒蔓
人稀幽徑長新苔
貧家竈冷炊煙晚
待得鄰翁賣藥回

秋夜思南鄭軍中

五丈原頭刁斗聲
秋風又到亞夫營
昔如埋劍常思出
今作閒雲不計程
盛事何由觀北伐
後人誰可繼西平
眼昏不奈陳編得
挑盡殘燈不肯明

湖上

飄然世外更何求
終日橋邊弄釣舟
回視老身猶長物

縱無炊米莫閒愁
煙生墟落垂垂晚
雁下陂湖處處秋
欲覓高人竟安在
又聞長笛起滄洲
湖中有隱士月夜必吹笛人莫有見者

讀王摩詰詩愛其散髮晚未簪道書行尚把之句

因用為韻賦古風十首亦皆物外事也

我生本江湖歲月不可算
采藥遊名山所歷頗蕭散
一逢巢居翁見謂於我館
酌泉啖松柏每得造膝款
行道不自力殘髮日已短
海山故不遠謫限何時滿

又

仕宦五十年所至不黔突取魚固捨熊挾兔那恨鶻退
歸息厭厭誰敢書咄咄屋穿每茨草驢瘦可數骨秋風
忽已厲落葉襯殘月脫巾坐中庭清冷入毛髮

又

我愛古竹枝每歌必三反孤舟上荆巫天末未覺遠最
奇扇子峽恨不遂高遡荆棘蜀故宮煙水楚廢苑至今
清夜夢百丈困牽挽人生如寄爾勿歎流年晚

又

往歲著朝衫晨起事如曩告歸卧孤村枯淡有餘味閑
門絕外慕自謂真富貴蕭然畢吾生地下亦增氣里翁
戀兒女小疾輒憂畏惟窮可賒死我在君亦未

又

萬金築華堂千金教新音不知憂患場著脚日愈深今
人喜議古後亦將議今使汝有子孫聞之亦何心鄧通
擅銅山死日無一簪未死汝勿喜五溪多毒淫

又

往者遊青城猶及二三老稽首出世師數語窮至道妻
子真敝屣棄去恨不早俯仰纔幾時殘骸日衰槁吾兒
有奇骨亦復至幽討金丹儻可成白髮何足歸

又

稚川師鄭君纔及一卷書書大僅如箸度世蓋有餘想
其所論說妙極軒昊初內篇今雖存亦復飽蠹魚我欲
探其原蹇步空趑趄安得挿兩翅從公遊太虛

又

隱書有三景字字當力行寸地與尺宅可以久汝生沂
流歸崑虛堅守臨長城一旦告成功河塞黃金成笙鶴

適緱山貂蟬朝玉京即今修行地千古名還嬰

予道室
以還嬰

之名

又

行年過八十形悴神則旺往來江湖間垂老猶疎放滄
波浩無津天遣遂微尚剡溪挂風帆漁浦理煙榜奇雲

出深谷新月生疊嶂興懷晉諸賢誰能續遺唱

又

二十遊名場最號才智下蹭蹬六十年亦有茆一把典
衣租黃犢乘雨耕綠野西成得一飽敢計泥沒蹠住久
鄰好深百事通乞假秋高小菑香相喚注老瓦

夢行益昌道中有賦

朱棧青林小益西早行遙聽隔村雞龍門閣畔千尋壁
江月亭前十里堤酒舍胡姬歌折柳江津洮馬惜障泥

倦遊重到曾來處自拂流塵覓舊題

自規

忿慾俱生一念中聖賢本亦與人同此心少忍便無事
吾道力行方有功碎首寧聞怨飄瓦關弓固不慕冥鴻
老翁已落江湖久分付餘年一短蓬

幽興

蘭渚前頭湖水清了無俗事敗幽情雨淋茅屋隨時補
日射油窓特地明庭樹晚鶯窺戶語鄰園秋筍過籬生

芥菰漸美醺醺足誰共貧家一釜羹

記前輩語

疇昔見諸老從容聞至言馬非求路寢木豈願犧尊卧
起數椽屋嘯歌三畝園人生正應爾雲夢不須吞

貧居即事

筮易常逢坎推星但值箕老雖齊渭叟窮不減湘纍巷
月鳴衣杵庖煙爨豆箕秋深病良已且復強伸眉

又

地偏人罕到秋晚日猶長病去筇枝贅家貧菜粥香流
泉通藥壠積雨潤書囊欲譜幽居事踈慵久未遑

又

月黑梟鳴樹燈殘鼠穴牆床空圍紙被室靜蕤楓香不
恨言傷直惟憂慙敗剛回頭顧名利百世永相忘

又

米竭炊煙靜村深客屨稀庭除荒宿莽籬落帶斜暉風
惡披書卷鷗馴傍釣磯鄰家殊耐久相伴荷鋤歸

又

意緒喪家狗形骸槁木枝曲肱雖自適縱理固當飢買
絮初寒後畦蔬小雨時窮途何用卜吾道即蒼龜

又

守道常違俗存心不媿天終年飢過半動步謗居前力
倦少行立氣昏多睡眠今宵風月好扶杖到溪邊

自詠

素慕巢居穴處民久為釣月卧雲身經行山市求靈藥

物色旌亭訪異人
高枕靜聽棋剝啄
幽窓閒對石嶙峋
吾廬已是桃源境
不為秦人更問津

枕上作

一室幽幽夢不成
高城傳漏過三更
孤燈無焰穴鼠出
枯葉有聲鄰犬行
壯日自期如孟博
殘年但欲慕初平
不然短楫棄家去
萬頃松江看月明

秋曉聞禽聲五韻

秋曉風露佳
天宇曠以清
鳥雀當此時
意樂有和聲
人

獨不自喜乃欲鳴不平世事雖萬端但可笑絕纓君看
郊與島徒自殘其生

對酒

素月度銀漢紅螺斟玉醪染丹梨半頰斫雪蟹雙螯詩
就吟愈苦盃殘興尚豪閒愁翦不斷剝欲借并刀

又

密篠持苦屋寒蘆用織簾虱肩柴熟菴

東坡煮猪肉訣
云淨洗鍋少著

水柴頭
烟燭不起

萼菜豉初添黃甲如盤大紅丁似蜜甜街頭

桑葉落相喚指青帘

示鄰里

古學陵夷失本原讀書萬卷誤元元從今相勉躬行處
士庶人章數十言

重示

篤學仁何遠窮居道亦行能充氣剛大誰蔽性光明家
世艱難業鄉閭宿昔情歲殘相勞苦惟是語春耕

雨夜起行室中

老疾逢秋體自輕，披衣暫起繞床行。
隙風不斷燈將滅，簷雨如傾階欲平。
鰥叟何嘗愁枕冷，病夫未免待窓明。
拂書洗硯龜堂上，幽事誰知日有程。

閏月辛酉壬戌連日風雨癸亥早晴

殘雨在簷猶點滴，斷雲銜日正蒼涼。
清愁偏向暮年覺，少睡不禁秋夜長。
簾影漸生禽語樂，杵聲初動藥塵香。

諸兒作吏俱安否，那得藥風至汝傍。

予諸子伯叔
季皆出仕

秋思

少日猖狂不自謀，即今垂死更何求。
簡編不隔聖賢面，夢寐時為河嶽遊。
濁酒未傾心已醉，長歌欲發涕先流。
石帆射的煙嵐晚，過雁聲中又一秋。

又

十日秋陰滿徑苔，蓬門那有客敲推。
水邊丹葉已如許，籬下黃花猶未開。
空見遊僧衡嶽去，難逢新雁杜陵來。
溪雲一片閒舒卷，戀著漁磯不肯回。

閒遊

江邊小市舊經過歲月真如東逝波
茶竈酒壚多識面
少留賣藥買漁蓑

又

溪橋偶與僧遊話草市來尋逆旅炊
自笑一生為客慣
捉驢小豎訴朝飢

又

袞除情累煙波上放蕩胸懷詩酒中
禹會橋邊潮落處
夕陽幾度繫孤蓬

對鏡

面大如盤七尺身珥貂自合上麒麟詩家事業君休問
不獨窮人亦瘦人

幽居書事

老人初起厭囂喧塵几從教鼠迹存赤腳平頭俱遣去
倚牆危坐嚙朝暾

又

買魚賒酒皆高興野店溪橋圖畫中從此衰翁自行耳

不須多事喚蠻童

偶與客話峽中舊遊

我昔旅遊秋雨細建平城東門欲閉主人迎勞語蟬聯
小婦春炊縞衣袂長年三老半醉醒蜀估峽商工算計
須臾燈闇人欲眠泊船卸馱猶相繼山深水嶮近蠻獠
往往居民雜推髻即今屈指四十年懷抱淒涼真隔世
讀老子次前韻

平生好大忽瑣細焚香讀書戶常閉少年曾預老聃役

晚歲欲挹浮丘袂力探玄門窮衆妙肯學陰謀畫奇計
言狂不獨人共排志大仍憂後難繼君看淡掃出繭眉
豈比一尺春風髻著書勿恤飽蠹魚會有子雲生後世

作籬

生世八十餘日夜迫衰老中年所築舍傾壞當官道每
逢風雨夕性命凜莫保況此蘆竹藩何恃不摧倒今朝
手自葺不暇避塗潦鷄豚有限隔門巷得鋤埽豈惟禦
盜竊亦足慰懷抱陰雲忽四垂見事幸差早

寓歎

老生讀書百絕篇日晏忘食夜廢眠孝經一生行不盡
況有六籍陳吾前華軒玉食非素願廣廈高墉實郵傳
經營歸計笑時人我老但須書數卷

衡門感舊

蒼煙屯不散足素橫郊原雨細不濕衣著水始見痕躊
躇意自佳未遽掩衡門一一送歸鴉楓林猶未昏念昔
壽州歸紹興初紀元闔門過百口一身今獨存不死實

有命送老三家村躬耕幸得食萬事不足論

客中作

江天雨霽秋光老野氣川雲淨如埽投空飛鳥雜落葉
極目斜陽襯衰草平沙爭渡人鵲立長亭下馬障泥溼
纍纍紅果絡青篾未霜先摘猶酸澀客中雖云貧路程
買薪糴米常留行茆檐獨坐待僮僕不聞人聲聞碓聲
讀書示子適

我性苦愛書未始去几案生雖後三代意尚卑兩漢世

哀道術壞年往朋友散澤居貧至骨霜冷衣露飢猶能
樂其樂肯發窮苦歎爾來更可笑身糴兒炊爨一飽輒
欣然弦誦等雖泮望古雖天淵視俗亦冰炭阿適可憐
生相守忘夜旦孤學當世傳歲月不可翫

老懷

老懷常易感秋雨苦難晴羈枕悲歡夢高城長短更榮
枯一螳堙成壞幾棊枰抱疾茅檐下行人肯寄聲

昨日
得李

孟達
書

沉繇

沉繇久未平寂寞閑柴荆危葉先霜墜殘螢冒雨明記
書由默誦得食出躬耕此事吾親驗方當告後生

遊近村

行歷茶岡到藥園却從釣瀨入樵村半衰半健意蕭散
不雨不晴天晏溫薯蕷傍籬寒引蔓菖蒲絡石瘦生根
參差燈火茆檐晚童稚相呼正候門

又

被髮行歌雪滿膺夕陽顧影亂鬢髻乞漿得酒人情好
賣劍買牛農事興社鼓賽秋聞坎坎塢燈照夜望層層
歸來閒指烏藤說箇是人間耐久朋

小亭


除地編茅作小亭一川風露對青冥殘螢欲盡猶穿戶
落葉初飛已滿庭櫟老無心求匠石鬼靈有說拒奴星
餘年默數能多少盡付黃庭兩卷經

記夢

少日飛揚翰墨場憶曾上疏動高皇寧知老作功名夢
十萬全裝入晉陽

又

老來百事不關身北陌東阡一幅巾忽夢行軍太行路
不惟無想亦無因



劔南詩豪卷六十三

欽定四庫全書

集部

劔南詩稿卷六十五

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劍南詩彙卷六十四

宋 陸游 撰

養疾

齒耄嬰新疾才衰減舊名
短筇扶蹇步小院愜幽情
卜叟言災退醫翁賀脈平
飯香炊糲糲羹美醢蕪菁
菊頽寒猶小楓林曉漸頽
清詩披客贄佳著指僧枰
家塾燈前課村陂雨外畊
從今尚何事賴此遣浮生

客從城中來

客從城中來相視慘不悅
引盃撫長劍慨歎敵未滅
我亦為悲憤共論到明發
向來酣鬪時人情願少歇
及今數十秋復謂須歲月
諸將爾何心安坐望旄節

暮秋中夜起坐次前韻

東吳秋令遲得雨亦良悅
中庭有流螢烈風吹不滅
披衣起坐久鼓角參差發
西成雖作勞農事亦漸歇
老怯歲律殘俛仰忽九月
蟋蟀鳴壁間媿汝知時節

閒遊

白石牀平偶小留青芒屨穩復閒遊微丹點破一林綠
淡墨寫成千嶂秋竹院頻分齋鉢飯苔磯時把釣魚鉤
要知此老神通否二十年來不識愁

自規

老疾今俱至艱難亦備更箇中無障蔽何處欠光明一
日能用力三年亦有成脩身在我爾勉勉盡餘生

所謂
三年

有成者豈
獨為國哉

自笑

學道功賒歲月馳平居自笑著鞭遲安心未竟夜饒夢
與世雖疎秋尚悲藥圃幽尋芒屨濕蒸枰愁戰角巾欹
只愁今夕西窗夢又買長筒到古邨

泛舟至鏡湖旁小市

久著朝衫負此湖扁舟剩喜補東隅市樓合樂醕新熟
寺壁殘詩字欲無常日不堪愁宛轉此行猶得笑須臾
夕陽鷗鷺皆相識更覺人間是畏塗

懷舊

身是人間一斷蓬
半生南北任秋風
琴書昔作天涯客
蓑笠今成澤畔翁
夢破江亭山驛外
詩成燈影雨聲中
不須強覓前人比
道似香山實不同

道院述懷

學道已非生死流
極知心外更何求
理窮性盡命亦至
氣住神全形自留
大藥一爐真度世
孤桐三尺可忘憂
故人怪我歸來晚
太華峰頭又素秋

又

八十年前一炷香依然餘習未全忘舊緣入靜多扃戶
近為精思別置牀篝火古鐺煎檜蜜汲泉小甕釀松肪
老翁正似遼天鶴更覺人間歲月長

秋雨

雨滴何由止人眠不復成雲深無雁影村近有砧聲草
草殘年夢寥寥後世名泰山並螳垤俱向酒中平

又

秋晚無旬雨雨晴當有霜頗思遊近縣亦已戒輕裝珍
薰披繇美寒醅撥雪香菊花常歲有所喜及重陽

聽雨

髮已成絲齒半搖燈殘香燼夜迢迢天河不洗胷中恨
却賴檐頭雨滴消

畏事

畏事偷安百不能飯蔬聊得曲吾肱舊交夢裏時時見
宿疾秋來日日增遣悶自鉏幽圃藥扶衰猶賴故溪藤

不因顧見鬚髻影全是深山退院僧

刈穫後書事

鄰里西成例少蘇貧家生業得徐圖雖非五鼎豈無食
未辦複禪猶著襦牢羴漸肥堪奉祭耕牛已買不求租
却思流落天涯日要是家居勝道途

又

耄歲誰知困不蘇每虞黠鬼笑狂圖陶公老去但濁酒
管老歸來惟白襦不逐兒童覓無味且隨鄰曲了殘租

細思自有欣然處高謝人間九折途

秋夜五鼓初起坐堂上至旦

蒸鬱不可過開門星滿天身還倚藤杖手自酌巖泉雞
唱猶相續鴉飛忽已翩事隨朝日出佳思復茫然

習嬾自咎

習嬾多遺事時能害睡眠糴驕殘竹筍鼠橫齧牀羶獨
子巡籬落狸奴護簡編人間有俊物求買敢論錢

雨夜枕上作

雨點滴我心雨氣傷我魂但憂草廬破敢思布被溫市
壚酒如山不濕老瓦盆天其遂吾心窮死三家村

晚飯後步至門外並溪而歸

徐行摩腹出荆扉掠面風尖酒力微市步空船迎荻去
湖隄輕擔賣魚歸潺潺沙竇鳴殘水莽莽平蕪襯落暉
商略最關詩思處滿村砧杵搗秋衣

文章

文章如奕棋分量固有極學不盡其才識者為太息古

來名世士亦或墮此域至今讀其文曷嘗不追惜士生
千載後風慕當自力如其不能然歸哉事畊織

枕上口占

白首區區道未明故山悔不蚤歸畊勇如搏虎但堪笑
學似累綦那易成殘雨墮檐時一滴老雞棲樹已三鳴
村居孤寂如何憾兩耳猶勝聽市聲

乙丑九月三日晚久雨驟晴西南新月如玉鉤重
陽以八月置閏菊花粲然滿園喜作一絕記之

初三新月見如期重九黃花又及時俱是人間稱心事
典衣一醉更何疑

寓歎

蕭疎殘髮數莖絲勝負渾如未算棋萬里旌旗無昨夢
一蓑煙雨有新詩潛消暗換人誰在小醉閒眠我自奇
二十四年能幾許汾陽回首亦成癡

村興

結宇楓林下久窮吾所安村深事自簡累少食差寬雨

閤牛眠屋泥深鴨滿闌呼兒擣粉餌準擬賽都官

夜聞埭東賣酒鼓聲譁甚

烏柏森疎照溪赤寒鴉翻翻蔽天黑鮮鱸出網重無斤
新蠲登盤大盈尺年年此際清霜夜飯罷讀書聲滿舍
豈惟父子講家學亦有朋儕結經舍誰令屠沽聚里中
鼓聲終夜聒老翁嗚呼安得寐無聰不但杜老左耳聾
燈下晚飧示子適

家貧短衣不掩骭空庖淒淒竈不爨老翁八十忍飢熟

兀坐空堂日常肝今年閏餘九月寒那敢遽議南山炭
艱難幸復致一飧舖獸燈前百憂散適子挾冊于于來
時與乃翁相論難但令歆向竟同歸門前籍湜何憂畔

秋晚書懷

七澤三巴日月長即今萬事付茫茫結廬窮僻新知少
屬疾沈綿舊學荒中夜飯牛初上阪千年化鶴復還鄉
自憐尚覺身為累剩蓄荆薪待雪霜

又

顏然兀兀復騰騰萬事惟除死未曾無奈喜歡閑弄水
不勝頑健遠尋僧喚船野岸橫斜渡問路雲山曲折登
却笑吾兒多事在夜分未滅讀書燈

初寒

久雨重陽後清寒小雪前拾薪椎髻僕賣菜搖頭船薄
米全家粥空牀故物羶身猶付一敝名字更須傳

船見

張志
和詩

黃昏小雨中
慙慙蒼頭在傍云
初未嘗得瞑予乃

甚適若熟寐者作五字記之

人看初無寐形勞幸少休夢魂雖栩栩鼻息未齁齁輕
若風中絮浮如水上漚死生君了否試向此中求

乾道之初卜居三山今四十年八十有一感事抒
懷

乾道之初結草廬三朝六見紀元初年先拋擲雖加倍
生計蕭條愈不如目暗欲盲停夜課髮殘無幾怯晨梳
市聲風便猶關耳未死終當更徙居

視東臯歸小酌

築陂下麥晚歸來圍火烘衣始此回
但得諸孫傳素業
真無一事挂靈臺
井桐葉落垂垂盡
籬菊花殘續續開
不負初寒蟹螯手
牀頭小瓮撥新醅

又

少年誤計慕浮名
更事方知外物輕
身誓生生辭祿食
家當世世守農畊
授時堯典先精讀
陳業幽詩更力行
最好水村風雪夜
地壚煙暝歲豬鳴

梅市道中

去去浮官浦悠悠數客檣
蓼花低蘸水楓樹老經霜
蕭鼓迎神鬧鉏耰下麥忙
城西小市散歸艇滿斜陽

又

雨暗山陂路人喧古渡頭
廟垣新畫馬村笛遠呼牛
買飯諳爭席迎潮競解舟
平生苦吟處又送一年秋

古寺

秋草荒無路來遊感廢興
殘僧僅粥飯古像冷香燈
扶

病驚重到題名記昔曾自量難笑汝一歎倚枯藤

夢中作

繫馬朱橋上酒樓樓前敷水拍堤流春風又作無情計
滿路楊花輓雪球

又

大慶橋頭春雨晴行人馬上聽鶯聲祥符西祀曾迎駕
惆悵無人說太平

舟行魯墟梅市之間偶賦

短髮蕭蕭久挂冠江湖到處著身寬
夢花不逐蘋花老
桐葉常先槲葉殘
未卜柴荆臨峭絕
且謀蓑笠釣荒寒
閒人尚媿沙鷗在
始信煙波得意難

衰疾

衰疾支離負聖時
猶能采菊傍東籬
捉衿見肘貧無敵
聳膊成山瘦可知
百歲光陰半歸酒
一生事業略存詩
不妨舉世無同志
會有方來可與期

惜昔

偶見張安國周子充劉韶美王景文陳德公
任元受遺集為之感愴作長句抒悲不知涕

泗之
集也

憶昔高皇絀柄臣招徠賢雋聚朝紳寧知遺恨忽千載
追數同時無一人羶骨九原應已朽殘書數帙尚如新
此身露電那堪說也復燈前默愴神

雨後寒甚

陂澤連山脚風煙接海濱孤鴻悲遠客殘菊伴陳人酒
盡瓶枵腹壚寒客曲身老翁殊耐事一笑自回春

入冬病體差健而貧彌甚戲作

乞骸自喜脫風塵北陌東阡負未身夢裏相逢無豎子
面間時出有真人閒憑曲几還終日不出衡門動過旬
送老壺鹽君勿笑天教成就一生貧

蜀漢

憶昔遨遊蜀漢間駸駸五十尚朱顏呼鷹雪閣天回路
采藥雲迷御愛山舊事已無人共說征途猶與夢相關
夕陽不覺憑闌久待得林鴉接翅還

新聞小室

並檐開小室僅可容一几東為讀書窓初日滿窓紙衰
眸頓清澈不畏字如螳琅然絃誦聲和答有稚子餘年
猶幾何此事殊可喜山童報炊熟束卷可以起

初冬絕句

鱸肥菰脆調羹美麪熟油新作餅香自古達人輕富貴
例緣鄉味憶還鄉

又

道途冬暖衣裘省村落年豐鼓吹喧下麥種麪無曠土

壓桑接果有新園

即事

雲起山容改潮生浦面寬
寒鷗先雁到烏桕後楓丹年
邁狐裝帽時新豆搗糲非關嗜
溫飽更事耐悲歡

又

遜居無外事白日不勝長
詩為窮差進琴雖老未忘映
窗精試墨閉閤苦留香年少
無相誚功名事更狂

又

日上小牕東禽鳴高樹中樂哉容膝地著此曲肱翁香
近常遲散兒來亦旋通所慙貪坐睡鉛槧少新功

又

紙潔晴窗暖粳新午飯香嗜眠為至樂省事是奇方孤
蝶弄秋色亂鴉啼夕陽詩情隨處有信筆自成章

又

井稅無餘負川原已飽犁樵歌歸市步帆影過河堤野
實丹雘漆村醪蜜與蠶雖云有豐約不廢醉如泥

又

還鄉吳語熟伏枕越吟悲接客寒溫簡過鄰几杖隨獨
嗟親舊少不覺歲時移陌上人爭看風歆白接羅

閒吟

閒吟可是治愁藥一展吳牋萬事忘不惜暮年酬倡絕
猶能作意答秋光

自遣

衣冠尚作閒身崇梁肉終非退士宜惟有褐裘并豆飯

尚能相伴到期頤

記乙丑十月一日夜夢

夢裏江淮道上行解裝歸榻喜新晴店門邂逅綈袍客
共把茶甌說養生

又

旋糴街頭米數升黃昏看上店身燈明朝山路聞饒石
買得烏騾喜不勝

縱遊

人事元知不可諧
名山踏破幾青鞵
百錢拄杖無時醉
一鉢隨身到處埋
驛壁讀詩摩病眼
僧窗看竹散幽懷
亦知詩料無窮盡
燈火蕭疎過縣街

村居書事

過門車馬誰曾入
塞路蓬蒿不復鋤
雨漏日惟支敗屋
鼠餘時自緝殘書

又

矮甌煮粥猶難繼
小甌蒸糕豈解常
偶得鹽醯便豪侈

晨餐滿舍野蔬香

又

架橋築路村翁事裂網伸鉤老嫗心自笑年來足衰態
軒昂故步嬾重尋

又

書收鼠齧猶堪讀柿拾鴉殘亦自甜動念不如姑省事
智謀老健恐難無

又

修身世世詩書業營利明明市井人安得後生俱自好
百年門戶本來貧

又

文辭苦思徒妨睡官職虛名不療飢垂老始知安樂法
紙鷺竹馬伴兒嬉

湖堤暮歸

出郭並湖無十里我歸蟹舍過魚梁川雲蒼白不成雨
汀樹青紅初著霜俗孝家家供菽水農勤處處築陂塘

樂哉追逐鄉三老半醉行歌詠歲穰

題搨本姜楚公鷹

憶昔呼鷹塞草枯妖狐狡兔笑談無
明窗見畫空三歎恍若霜郊遇獵徒

又

弓面霜寒斗力增坐思鐵馬蹴河冰
海東俊鶻何由得空看絳州舊畫鷹

書巢五詠

銅之在人間細大各有境散為五銖貨聚作九牧鼎天
祿與辟邪乃復參泓頴致用孰相須寒泉出金井

右硯滴

古者貝為貨庶物賴以通後世貴銅臭退處書几中楮
生借光輝文字傳無窮言利古所羞孰謂汝不逢

右研蠶

時來偶見收過時自當退豈惟裁紙尾亦或用牘背人
情有貴賤志士感興廢庫中九萬張視我猶前輩

右故紙

鸞膠擣松煙成此金石姿雖以剛故折挺特終不移微
功在簡冊敢惜身蹈危雖非破硯文永世亦有辭

右折墨

銅壺受五升中貯太古醇相從亦已久一朝委流塵我
豈少恩哉白頭乃如新誰知矮道士亦作斥仙人

右空酒壺

感遇

仕宦五十年終不慕熱官年齡過八十久已辦一棺結
廬十餘間著身如海寬此外皆長物簡去心始安稱意
多怒嗔易可出難難我無狐白裘短褐亦禦寒

又

士方貧賤時藜藿苦不足一朝得富貴奴僕饜梁肉大
哉食亞夫空器餽荀彧何如茆檐下父子共饘粥我生
有至願世世謝寸祿有子復有孫無榮亦無辱

又

人之所甚患飢渴與寒暑粗免則已矣過計安用許自奉非其分三彭將嫉汝寓形天壤間大抵皆逆旅但能飽菜根何地不可處堂堂七尺軀切勿效兒女

又

我以善勉汝汝謂出訾毀置之不復言意又不能已為善如築臺成功由積累中休猶不可況本無基址未言破萬卷日且讀十紙學雖在力行要是從此始

又

我初居三山同里數十人尊酒相勞苦言辭亦諄諄去
來四十年皆成塚中塵子孫雖或存敗屋賣作薪此亦
何罪哉不過坐一貧我幸未至此亦復拙謀身無飯可
哺汝觸目成悲辛

又

人與人為徒事我蓋有緣司晨與警夜異類亦可憐舐
糠啄遺粒要使全其天人則當教誨見善或能遷盛怒
姑小忍雖蒲豈非鞭事過我亦喜陶然送流年

幽興

老向浮生意漸闌飄然俟死水雲間龜支牀穩新寒夜
鶴附書歸舊隱山無意詩方近平淡絕交夢亦覺清閒
一端更出淵明上寂寂柴門本不關

題詹仲信所藏米元暉雲山小幅

俗韻凡情一點無開元以上立規模鏡湖老監空揮淚
想見楚山清曉圖

徽宗見元暉楚江清曉圖大加賞歎

又

一棹朝南暮北風奇峰倒影綠波中定知漸近三山路
認得漁翁是放翁

詹仲信以山水二軸為壽固辭不可乃各作一絕
句

策蹇渡橋春雨餘亂山缺處草亭孤不知何許丹青手
畫我當年入蜀圖

右春山

雪崦梅村一徑斜茆檐煙火雨三家眼明見此幽栖地

却恨吾廬已太奢

右雪山

有所懷

鏡裏形模日夜衰
三峰師友久睽離
芝房又失耘鋤候
丹劑常思沐浴時
雷雨未成龍起晚
海天無際鶴歸遲
午窗一鉢青精飯
揀得香薪手自炊

自嘲老態

世念秋毫盡渾如
學語兒得牀眠易
熟有飯食無時少

帽簪花舞盆池弄水嬉從今轉無事靜坐不吟詩

十月十四夜夢與客分題得早行

蓐食寒燈下脂車小市傍驛門猶淡月街樹正清霜觸
目關河異興懷道路長丈夫當自力雙鬢易蒼蒼

紹興中予初仕為寧德主簿與同官飲酒食蠣房
甚樂後五十年有餉此味者感歎有賦酒海者
大勸盃容一升當時所尚也

昔仕閩江日民淳簿領閑同寮飛酒海小吏擘蟾山夢

境悠然逝羸軀獨爾頑所嗟晨鏡裏非復舊朱顏

病中雨夜

蹭蹬今如此沈緜不復支心隨形共頽年與智俱衰雨
急孤燈暗雲深斷雁悲舊書空滿架惆悵負明時

讀呂舍人詩追次其韵

士生始從學取友實先務吾聞諸古人傾蓋有如故漢
宮長生藥至取雲表露治身當何如而受一塵汚

又

有過當相規有善當相告豈惟定新交亦以篤舊好勢利古所羞置之勿復道霜霰萬木凋孰秉歲寒操

又

少壯如昨日忽已及耄期舊友散莫收亦復少新知言歸鏡湖上日日醉東籬自笑如寒蝶徘徊殘菊枝

東籬
字小

圖名

又

道士成金丹青雲可接翼小夫豈知此危坐學數息如

持一畚土自謂河可塞生不遇碩師幾何不自賊

又

三沐復三熏佩玉懷明珠何至不自珍欲效豕負塗傳
呼雖甚寵正可誇羣奴君看魏徵孫世世為農夫

庵中晚息

小庵摩腹獨徜徉俗事紛紛有底忙雲影忽生鴉蔽日
雨聲不斷葉飛霜經綸正復慙伊傳雜駁猶能陋漢唐
卷盡殘書窗已晚笑呼童子換鑪香

枕上

熒熒地爐火煮藥土牀前高帝老朝士長安舊少年松
高露時滴城遠鼓猶傳拋擲百年事且安殘夜眠

冬夜

杞菊家風有自來充飢藜糝不盈盃雲迷野渡一聲雁
雪暗山村千樹梅宴坐何妨面菴壁長吟且復畫爐灰
歲殘尚恨新春遠欲挽天邊斗柄回

雜興

陋巷無心長草萊柴門偶自不曾開
餘齡漸迫諸孫長徂歲將窮積雪來
旦欲燎衣無宿燼暮思頽頽但空罍
孰知自有忘憂處遠坐新書正作堆

又

此身漂蕩等流槎又向江村送歲華
急雨遇寒疑作雪明燈無炮結成花
座懸鏡古森毛髮甌聚茶香爽齒牙
況是貧家多樂事阿開漸學手吒叉

劍南詩稿卷六十四

欽定四庫全書

劔南詩藁卷六十五

宋 陸游 撰

稽山行

稽山何巍巍，
浙江水湯湯。
千里亘大野，
勾踐之所荒。
春雨桑柘綠，
秋風秔稻香。
村村作蟹棹，
處處起魚梁。
陂放萬頭鴨，
園覆千畦薑。
春碓聲如雷，
私債逾官倉。
禹廟爭奉牲，
蘭亭共流觴。
空巷看競渡，
倒社觀戲場。
項里楊梅

熟采摘日夜忙翠籃滿山路不數荔枝筐星馳入侯家
那惜黃金償湘湖蓴菜出賣者環三鄉何以共烹煮鱸
魚三尺長芳鮮初上市羊酪何足當鏡湖滴衆水自漢
無旱蝗重樓與曲檻瀲灩浮湖光舟行以當車小繖遮
新粧淺坊小陌間深夜理絲簧我老迷此詩妄繼古樂
章恨無季札聽大國風泱泱

贈論命周雲秀才

周郎頎然市中隱精神卓犖秋天隼忽來過我論五行

袖出詩卷如束筍人生一息不自保況我耄期真待盡
君今盛為談未來我亦聽之俱可輟雖然此心猶未泯
何至死去同蠢蠢地下不作修文郎天上亦為京兆尹

自嘲

受福元無一羽輕豈知造物假餘生抱疴不死躋高壽
遇亂能全見太平投渚斷鴻常自閔營巢倦鵲固難成
乘除亦有堪慙處記誦文辭誤得名

自寬

兀兀空齋靜掩扉
篝爐香細著秋衣
檐頭殘雨晴猶滴
欄角羈雲晚未歸
支枕口和心共語
挑燈形與影相依
卷書未覺唐虞遠
知我何妨舉世稀

唐虞

唐虞雖遠愈巍巍
孔氏如天孰得違
大道豈容私學裂
專門常怪世儒非
少林尚忌隨人轉
老氏亦尊知我稀
能盡此心方有得
勿持糟粕議精微

幽事絕句

死生歸有命榮悴出無心苔井閒磨劍松窗自斲琴

又

矮紙來吳下長毫出宛陵自書霜夜句持寄剡中僧

又

昨夕風掀屋今朝雨壞牆雖知炊米盡不廢野歌長

又

煙畦朝斲藥雪澗夜淘丹仄徑何曾嶮單袍不覺寒

又

新傳服氣訣舊喜步虛吟兒女不難棄雲山何處深

又

客生聞吠犬草茂有鳴蛙日昃方炊飯秋深始采茶

寄題廬陵王晉輔先輩桂堂

楚人記草木桂在椒蘭中我懷小山句妙絕窮化工
唐
人作山水亦以桂配松丹葩間綠葉錦繡相疊重不知
始何時巖桂開秋風楚人所稱者委棄等蒿蓬嗚呼各
有時士豈怨不逢我作桂堂詩廣子雲夢胸

寄題王晉輔專春堂

堂前皆
種牡丹

三月風光不貸人，千紅百紫已成塵。
牡丹底事開偏晚，本自無心獨占春。

鼠屢敗吾書，偶得狸奴捕殺無虛日。
羣鼠幾空為賦此詩。

服役無人自炷香，狸奴乃肯伴禪房。
晝眠共藉牀敷暖，夜坐同聞漏鼓長。
賈勇遂能空鼠穴，策勛何止履羊腸。
魚飧雖薄真無媿，不向花間捕蝶忙。

道士李勝之畫捕
蝶獅貓以護當世

讀唐書忠義傳

志士慕古人忠臣挺奇節就死有處所天日為無色大義孰不知臨難欠健決我思果卿髮可配嵇紹血

病後作

骨相坐一寒仕宦經百謫晚入文昌省又坐煩言噴詔書復收召付以大典冊期年甫奏篇皇恐亟自劾歸來稽山下三食新穫麥草屨布裙襦徒步老阡陌今年疾屢作恍若將歸客道士言犯土拜章安舍宅巫言神去

幹翦紙招魂魄把臂忽自悟此豈屋漏脈盡去囊中藥
默觀鼻端白正氣徐自還鬼子何足磔

山中

草閣留雲宿溪橋引鶴行身閒詩曠逸心靜夢和平石
乳無時滴松肪徹夜明山中足幽趣不是傲公卿

夜思

風埽浮雲作快晴窗聲終夜雜簾聲月明滿院鵲驚起
霜冷壓栖雞嬾鳴名字虛稱舊朝士門庭元是老書生

尚餘一事猶堪喜北陌東阡醉太平

晨起

晨起梳頭雪滿膺可憐衰與病相乘浮名何足欺橫目
真樂聊須付曲肱仕有俸錢渠亦好退無耕壠我何憑
具牛力盡殊堪閔買犢東村恨未能

老態

破槥愁春近空園畏日長頭風便菊枕足痺倚藜牀
冉冉殘年逼悠悠萬事忘有兒堪晤語無客亦何妨

又

寡欲貧何損無才老更宜
挂牆多漢刻挿架半唐詩
飯已頻摩腹兒來暫解頤
尚悲吳蜀遠未免故人思

謂張季長

枕上

夜雨一再作燈前獨詠詩
影看孤鶴瘦吟答斷蛩悲
幽夢悠然覺清茄何足吹
殘年猶幾日已矣媿明時

贈過門道人

朝行市塵中奔馬不可及
暮涉清溪流芒屨了不涇
巖

扉一丹竈山路兩書笈白驢可置掌童子亦絕粒邂逅
安期生電逝不暇揖太華獨巍然萬仞道傍立

道院雜興

江上霜風吹角巾東歸不獨為吳萼埽除長劒華纓夢
收拾孤颿短棹身勾漏丹砂開竈晚商顏芝草滿山春
東封敢擬迎鑾仗且作行歌陌上人

又

征途暗盡舊貂裘歸臥林間喜自由體倦尚憑書引睡

心安不假酒攻愁丹爐弄火經年熟竹院聽琴竟日留
今旦理髯還一笑白間時有黑絲抽

又

早歲知聞久已空巋然猶有灞城翁東樓誰記傾春碧

敘州蓋古戎州也有東樓厨醴
本名重碧范至能易為春碧

北嶺空思擘晚紅

北嶺在福

州予少時與友人朱景參會嶺
下僧舍時秋晚荔子獨晚紅在

冉冉流年霜鬢外累累

荒塚綠蕪中琳房何日金丹熟老鶴猶堪萬里風

又

龜堂有叟富神通白髮何妨兩頰紅先取山川來掌上
却移天地入壺中鶯花不老非塵世風月常新奪化工
近作東籬君未見一尊少住莫怱怱

山村經行因施藥

閒行偶復到山村父老遮留共一尊曩日見公孫未晬
如今已解牧雞豚

又

耕傭蠶婦共欣然得見先生定有年埽灑門庭拂牀几

瓦盆盛酒薦豚肩

又

兒扶一老候溪邊來告頭風久未痊不用更求芎芷輩
吾詩讀罷自醒然

又

驢肩每帶藥囊行村巷歡欣夾道迎共說向來曾活我
生兒多以陸為名

又

逆旅人家近野橋偶因秣蹇暫消搖村翁不解讀本草
爭就先生辨藥苗

歎老

身歷遭回事萬端天教林下養衰殘文編似是他人作
書卷如曾隔世觀久已悠悠置恩怨況能一一記悲歡
牀頭周易真良藥不是書生強自寬

即事

秃尾驢嘶小市門側蓬帆過古城村此生感慨知何限

斗酒新豐不足論

又

草衣木食更何求
穴處巢居過即休
尚恨未能全省事
一竿風月釣滄洲

自賀

胎髮茸茸綠映巾
歸耕猶是太平民
流觴內史招同社
扛鼎將軍與卜鄰

敝居去蘭亭
項里皆甚通

曾冠六鰲非俗吏
已開

九秩是陳人一盃
剗約梅花醉又見
開禧第二春

天氣作雪戲作

八十又過二與人風馬牛深知老當逸孰謂死方休細
衲兒羅襪奇溫吉貝裘閉門薪炭足雪夜可無憂

家風

春耕秋釣舊家風門巷荒寒屋壁空四海交情殘夢裏
一生心事斷編中買魚日待攜籃女裹藥時從挾簾翁

俗謂買藥
為裹藥

便廢閒吟亦未可吾徒豈獨坐詩窮

十二月二日夜夢遊沈氏園亭

路近城南已怕行
沈家園裏更傷情
香穿客袖梅花在
綠蘩寺橋春水生

又

城南小陌又逢春
只見梅花不見人
玉骨久成泉下土
墨痕猶鏤壁間塵

江干

霜晴忽念到江干
小蹇羸童路已乾
骨相豈能當富貴
鬢毛聊喜耐悲歡
客途冬暖衣裘薄
村市年豐酒醖寬

殘獵即今無十日
剗求芹蓼助春盤

獨行過柳橋而歸

寒雲覆江干
慘慘雪欲作
草枯狐兔見
鷹隼方縱搏
老翁臥蓬戶
疾痛在腰脚
忽覺意稍佳
快若解束縛
呼童扶下堂
西出度略約
浮波見鳬雁
決起驚烏鵲
籬根犬迎吠
碓下雞俛啄
霜餘桑葉積
春近柳枝弱
徐行過傍舍
醉笑盛醕酢
歲暮農事休
羨爾羣飲樂

戲遣老懷

平生碌碌本無奇況是年垂九十時阿囷略如郎罷老
穉孫能伴太翁嬉花前騎竹強名馬階下埋盆便作池
一笑不妨閒過日歎衰憂死却成癡

又

清羸正怯倚闌干紗帽還驚半指寬日漏雲端纔欲暖
風催梅信又成寒尋僧竹院逢茶熟引鶴溪橋及雪殘
只道捐書差似達庖丁數紙尚須看

又

兒時萬死避胡兵，敢料時清畢此生。
已迫九齡身愈健，熟觀萬卷眼猶明。
深深小塢梅初動，漱漱清溪水欲平。
安得飄然從此逝，緱山風月聽吹笙。

又

舊襲家風號散人，晚承恩詔賜閒身。
放狂泥酒都忘老，厚價收書不似貧。
霜曉方驚羣木脫，春晴又喜一花新。
先生偶出人難遇，陌上爭先看角巾。

又

本意歸來老故丘
閉門飯足尚何求
閒雲一片自舒卷
幽鳥數聲相應酬
但得有書時到眼
正令無酒亦忘憂
東籬偏仄纔尋丈
已敵征西萬戶侯

對鏡

歲月雖遒邁形容未苦癯
髮如新沐潤顏似半酣
朱書讀常終卷山行亦却扶
悠悠隨日過不復歎頭顱

晨起

客枕畏霜氣曉窗收月痕
芸芸萬物作皎皎一心存老

已忘開卷貧猶力灌園兒孫能繼此亦足報君恩

吾年過八十

吾年過八十久已棄朝簪化蝶有殘夢焦桐無賞音溪聲喧夜旦野色變晴陰欲講平生學茫然不可尋

又

八十又過二自言名放翁斧斤遺壽櫟雲海寄冥鴻酒挂驢鞍側詩投藥笈中瀾城逢薊叟共語莫匆匆

述志

椎牛醢酒千人帳
破浪凌風萬斛船
常恨書生無此快
一生低首短檣前

又

新豐買酒慰無聊
衝雪騎驢上灞橋
羈老尚堪吞獬子
松風何至羨山苗

排悶

吹盡梅花了不知
化工也誤老人期
離離新草隨愁出
漠漠餘寒與睡宜
古錦一聯吟舊句
文楸數著理殘碁

波生澄澗君何怪禪榻從來映鬢絲

舟中作

林麓重重霧雨昏
舟晚過郡南門
鑄金越相遺祠古
執玉塗山王氣存
官道蒼茫多水驛
客遊飄泊厭風飭
剡中此去無多地
會約支公聽斷猿

丙寅元日

縹緲初聞寺閣鐘
霏微零雨兆年豐
家家椒酒歡聲裏
戶戶桃符霽色中
春枕方濃從賣困
社醅雖美倦治聾

從今萬事俱拋擲且作人間百歲翁

新晴

夜雨空階滴到明山雲忽斂作新晴門前月淡有檐影
牆外泥乾無屐聲與世日疎愁易遣入春得暖疾差平
便當剗作滄洲趣寄語沙鷗勿敗盟

新歲

改歲鍾馗在依然舊綠襦老庖供餽飫跣婢暖屠蘇載
糗送窮鬼扶箕迎紫姑兒童欺老瞶明燭聚呼盧

簡邢德允

邢子精靈舊絕塵爾來句法更清新
淡交喜得山栖友傑作疑非火食人
豈但僕奴看屈子直須塗改到生民
與君兩世交情厚剩欲燈前對角巾

簡蘇邵叟

君家文獻歷十朝魏公義冕加金貂
孫支得君愈雋發貴名突兀凌煙霄
居吳入蜀三十載諸公孰能折簡招
澗松意氣極磊砢天馬毛骨何超遙
鼎來行卷十九首

緱山明月聞吹簫
沈香亭畔未須說
想見風雪上灞橋
老夫誦之羣玉府
學士如堵不敢驕
爾來一編愈妙絕
槩若新霽瞻斗杓
出為龍首子何有
老穿豹尾我亦聊
湖邊酒樓無十步
胸次懣懣思同澆

東村

信脚村墟路歸來
日未西波清魚隊密
風小鵲巢低
水初平岸青蕪亦徧
犁市壚多美酒飲具不須齎

新歷歎

新歷在手心怕開日月聯翩相續來黃金散盡自一快
白髮不貸真可哀無為健羨廣成子千二百年終有死
膠不可黏西去日刀何由翦東流水酒無醇醕但痛飲
市醞上尊俱醉耳堂堂七尺死即休不飽烏鳶飽螻蛄
雪中

忽忽悲窮處悠悠感歲華暮雲如潑墨春雪不成花眼
澀燈生暈詩成字半斜殘尊已傾盡試起問東家

又

春晝雪如簍清羸病起時跡深驚虎過煙絕閑僧飢地
凍萱芽短林寒鳥哢遲西窗斜日晚呵手飲殘棊

早春出遊

微雲薄靄新晴後小蓋輕輿古道遙林杪幽禽初學轉
牆陰凍雪未全消酒壚日暮收青旆市步人歸擁畫橈
欹帽捫髯常半醉逢人誰與話無憀

又

人生何適不艱難賴是胸中萬斛寬尺宅常朱那待酒

上池頻飲自成丹
楚祠花發呼舟去
禹穴雲生倚杖看
更有新春堪喜事
一村簫鼓祭蠶官

東籬

東籬深僻嬾衣裳
書卷縱橫雜藥囊
無吏徵租終日睡
得錢沽酒一春狂
新營茅舍軒窗靜
旋煮山蔬匕筯香
戲集句圖書素壁
本來無事却成忙

又

漫道深居畫掩關
東籬栽接不曾閒
每因清夢遊敷水

自覺前身隱華山花發時時攜綠酒客來往往羨朱顏
藥爐安著猶無地擬展茅茨一兩間

又

東偏隙地作疎籬遇興無非一笑時陪客投壺新罰酒
與兒鬪草又輸詩山桃溪杏栽俱活藥鑊漁竿動自隨
家事猶令罷闕白固應黜陟不曾知

村市醉歸

明時乞得水雲身白首扶衰又見春橫木門幽謝來客

獨轅車小避行人湘湖水長蕤絲滑蘭渚泥融箭茁新
處處酒壚皆可醉不辭微雨墊吾巾

村夜

入春雨雪無休日雨止猶陰未快晴萬竅怒號風不定
半輪斜照月微明百年辛苦農桑業五處睽離父子情
但得平安已為幸孤燈殘火過三更

時子虞調官行在
子龍阻風西陵子

修在閩子坦在海昌
子與子布子通守舍

旅思

百病集殘骸閒遊且散懷
旅裝如遠役蔬食似長齋
買藥停山步求醫過縣街
春寒殊未已閉戶夜燃爇

對酒作

憑閣風吹帽穿林雨墊巾
相呼十日飲不負百年身
陌上金羈馬墳前石琢麟
於吾竟何有笑殺武陵人

遊東村

露草衡門曉風松一塢幽
新春有佳日老子得閒遊
鶴為忘機下魚緣得計
浮歸途無遠近一葉亂漁舟

晨起

老境真無事深居每畏人
喔咿雞失旦姪姀鳥鳴春
過擔餠餠白擎盤拒妝新
出門還可喜一笑語比鄰

夢中作

世事何由可控搏故山歸臥有餘歡
澗泉見底藥根瘦石室生雲丹竈寒
人遠忽聞清獻起山開頗得異書看
一朝出赴安期約萬里煙霄駕紫鸞

春雨

片片紅梅落纖纖綠草生無端夜來雨又礙出門行

又

春陰易成雨客病不禁寒又與梅花別無因一倚闌

又

胸懷阮步兵詩句謝宣城今夕俱參透焚香聽雨聲

又

疎點空階雨長明古殿燈廬山岑寂夜我是定中僧

村店

水汎輕搖檝山行穩跨驢朝晡半晴雨閭里雜樵漁野
鷺浮寒浦飢鴉集老樗店家看壞壁忽見昔年書

久雨薪炭食飲俱不繼戲作

澤國春饒雨書生老益貧固難誇練炭亦豈擇勞薪鹽
盡纔供莫醯微尚惱鄰人嗤信書誤癡絕望常珍

溪上

偶就澄溪照幅巾蘭亭遺韻想清真功名不入山林夢
詩酒猶關老病身萬事只增思魯歎百年常媿避秦人

超然聊喜高情在手挈長條貫細鱗

謝君寄一犁春雨圖求詩為作絕句

說著功名我自羞喜君解劍換吳牛莫將江上一犁雨
輕博人間萬戶侯

又

老農雖瘠喜牛肥回首紅塵萬事非耕罷春蕪天欲暮
小舟衝雨載犁歸

二月一日夜夢

夢裏遇奇士高樓酣且歌
霸圖輕管樂王道探丘軻
大指如符券微瑕互琢磨
相知殊恨晚所得不勝多
勝算觀天定精忠壓敵和
真當起莘渭何止復關河
陣法參奇正戎旃相蕩摩
覺來空雨泣壯志已蹉跎

新晴

寂寂房櫳鳥雀聲熏籠茶竈正
施行繁花滿樹春纔半
斜日穿雲雨乍晴引睡書橫猶在架
圍棋客散但空枰
病懷莫道傷幽獨小榼芳醪手自傾

又

挂冠湖上遂吾初捫腹消搖適有餘羹煮野蔬元足味
屋茨生草亦安居市廬分熟通賒酒鄰舍情深許借驢
更喜新晴滿牕日籤題重整一牀書

望永思陵

高帝中興萬物春青衫曾忝綴廷紳仕為將相却常事
年及耄期能幾人早幸執殳觀北伐晚叨秉筆記東巡
歸耕况復蒼梧近鬱鬱葱葱佳氣新

紹興末駕幸金陵
游適在朝列淳熙

宋上命羣臣薈集文華閣
修高宗實錄游首被選

燈下小酌

江湖雙鬢禿宇宙一身窮
酒浪搖輕碧燈花落碎紅
交情元易見春事半成空
尚覲身強健煙畦擷芥菘

春遊

杏花天氣喜新晴
白首書生樂太平
小陌鞦韆雖隔世
名園被袂尚關情
山林自古流觴地
絃管誰家送酒聲
莼菜鱖魚初滿市
莫將羊酪敵南烹

又

窮愁終日竟胡為老健人間自一奇每駕柴車遊古寺

閒騎竹馬伴羣兒登臨蘭渚流觴地

蘭亭本名蘭渚

蕭散狐泉

冷澁時練布單衣白羽扇路傍人總道相宜

春日雜賦

羈懷病思正厭厭詩卷漁竿信手拈老境何嘗忘一笑
春風也解到窮閭殘花滿地無餘萼新筍掀泥已露尖
轉老轉窮君勿笑熊蹯魚腹豈容無

又

鬢毛八九已成霜此際逢春只自傷
苦雨不容花抵敵餘寒猶賴酒禁當
退紅衣焙熏香冷古錦詩囊覓句忙
堪笑散人閒事業西牕容易又斜陽

唐樂府云牀上小
熏籠韶州新退紅

又

江湖放浪水雲人藥物枝梧夢幻身
移竹南牕初試筍埽花北陌旋成塵
窮忙自笑常終日老健猶能不負春
未遂初心惟一事乞薪賒米惱吾鄰

又

乞得身歸剡曲邊
衡門茅舍共蕭然
向來誤計守書冊
此日遣愁無酒錢
俗客妬閑來衮衮
流年欺老去翩翩
梨花楊柳清明過
且向江村剡放顛

又

人生覓飯元多術
最下方為祿代耕
脫却朝衫猶老健
快如苦雨得春晴
鳥聲頻喚五更夢
花氣頓醒三日醒
最喜晨興聞剡啄
吾兒書札到柴荆

悲歌行

讀書不能遂吾志屬文不能盡吾才遠遊方樂歸太早
大藥未就老已催結廬城南十里近柴門正對湖山開
有時野行桑下宿亦或慟哭中途回檀公畫計三十六
不如一篇歸去來紫駝之峰玄熊掌不如飯豆羹芋魁
腰間累累六相印不如高臥鼻息轟春雷安得寶瑟五
十絃為我寫盡無窮哀

梅市暮歸三山

日日蠻童佩一壺
壺乾時亦復村酤橫
林露塔遠猶見
暮靄籠山淡欲無
綠浦例憑菰作界
畫橈常遣鷺前驅
此身元是滄浪客
敢學高人乞鏡湖

龜堂偶題

文章何物求渠力
詩亦安能使汝窮
春水一池花百本
此生未易報天工

又

細肋臥沙來左輔
巨螯斫雪出東吳
不知一飽摩便腹

得似茅檐薺糝無

泛湖

白鷺雙飛導我前
自疑身是水中仙
放舟漢客樵風裏
擲釣秦皇酒瓮邊
山寺雲間傳講鼓
漁家浦口起炊煙
箇中得意君知否
買盡煙波不用錢

劍南詩橐卷六十五